

蘄州志卷之十二

知蘄州事嶺西封蔚祜纂修

人物志

仕蹟

州人登仕籍者唐宋以來稍稍可攷至明而盛古稱鄉先生沒而祭於社者不在是與顧其宦業或不傳而傳者又復不備功名之際信當時而貽後世若斯之難也斯亦足以觀感而興矣志仕蹟

南唐

蘄州志

卷十二

仕蹟

一

陳起舉進士為黃梅令時妖人諸祐自言能使貧者富富者貧俚民效之積眾數百夜行晝息取資如盜起到官諸祐為里長不服嫚言曰吾取令頭如殺豎子耳起聞執祐斬之由是知名官至御史卒

丁必稱字季言知臨江軍時江西私置例以稅產均敷無稅者以物力必稱積郡帑贏餘代輸之乃請於朝乞永與蠲免擢潼川提點刑獄

元

朱仕俊字時英元至正壬辰以上舍生授樞密院經歷

轉戶部郎中俄遷本部侍郎時方重守令之選出守江西贛州興學勸農禁除淫祀俗尙爲變尋改潮州土豪金元佑僞立名號大肆剽掠仕俊畫策白之當道遂擒元佑未幾調判延平稍遷建寧同知致仕歸自號白雲道人更號東村叟性廉介好讀書喜接賓客涉事不爲誕謾浮薄卒五十一

明

陳堯章博極經史讐校精謹洪武二年任本府儒學訓導陞浙江臨安知縣興利除害惠愛及人以勤勞致

蘄州志

卷十二

仕蹟

二

疾卒於官民思之比之羊叔子云

趙霖洪武二年任本府儒學訓導陞鳳陽府通判學道愛人根於天性故其贊畫時政率多裨益長貳無腹誹之者

黃安泰洪武初知彭澤縣時兵燹後民物凋瘵安泰以廉勤爲政百廢俱舉民賴以寧

馮思齊字賢希號香山洪武初以貢入太學上幸學偉其儀度瓌瑰擢御史初爲諸生與百戶黎暄有隙及按江西暄誣繫九江獄中思齊平心直之後以言事

激切調雲南推官尋召選

朱彤字彥功洪武丙子舉人通判紹興廉公有威人不

敢干以私去官送者闕郊父老流涕而別

浙江名宦

熊翼由太學生中永樂癸卯鄉試甲辰進士宣德中為

御史巡按陝西劾鎮守中官占種屯田擅役士卒田

迄還民正統四年授僉都御史督甘肅軍務鋤豪強

恤軍士在邊十年以剛正見稱擢副都御史及歸老

移籍河南之光州子恂仕至尙書

通志

宋誠字彥實治春秋正統戊午鄉貢第三人仕四川劍

蘄州志

卷十二

仕蹟

三

州知州以才力調徐州河功成陞叙州府知府礦賊

亂練習鄉勇守禦復從大軍征剿賊平蜀王列公入

告召對賜食賜蟒加正三品俸陞整飭榆林副使辭

予告馳驛歸里居二十年不事請謁捐貲建廣積倉

蘄民賴焉卒年八十三孫良相持敘州名宦錄上湖

廣督學滕公徽州學崇祀子六長璧綦江縣主簿舉

孝子次奎臨清提舉司次環直隸三河教諭俱成化

歲貢次埜河南陝州同知次基出穀賑饑旌獎義士

次堅陰陽典術環長子良臣宏治甲子舉人河南確

山縣知縣次子良相嘉靖歲貢四川來安縣訓導節錄

白茅堂
集傳

陳溱字濟寬中正統九年甲子鄉試授虞部主事有澤
梁之任分督濟寧河間時值中貴樓船犯禁卽繩以
法不少假借中貴銜之因媒孽其短逮詔獄謫戍貴
州清平衛溱慷慨就道至則日持戟以從事至於憤
集憂深發諸詩歌皆怨而不怒素所爲詩若不加意
而清麗流動有陶謝之風著有獨醉稿散逸無傳

張禧字吉夫景泰庚午舉人授推官性抗直人不敢干

蘄州志

卷十二

仕蹟

四

以私讞獄多所平反與長官不合丐歸家貧甚州大
夫聞而周之悉不受清苦之節士推重焉

王翰字廷舉景泰癸酉舉人丁丑進士由戶部郎中授
廣信知府方正廉勤愛民如子陳便民七事刊落時
弊務行其所志性剛直不撓於時適朝廷下沙汰庶
官之令將命者至莫不振懾翰獨不一屈膝因與之
忤解印綬歸得山曰細石規做數楹植松萬章以爲
環堵因匾曰萬松窩日坐其中校讐古書如不及絕
口不理當世事澹如也年八十五卒著有萬松窩集

藏於家

華仲賢字廷佐天順己卯舉人成化乙未進士授刑部
時山西潞城縣王濬以貪酷聞上命仲賢按其事實
得實上其狀罪各有差自是名益著轉本部員外擢
守常州以循良稱擢廣東叅政朝廷命下採珠撫鎮
重臣慎選藩臬廉能者董其事僉推仲賢比往祛舊
弊飭新政事集而民不告勞擢四川右布政未幾擢
福建左布政以廉靜寡欲老成練達考上最銓曹請
爲御史大夫未報宏治甲子以疾免越九年卒於家

蘄州志

卷十二

仕蹟

五

子巒另傳

甘澤字仁夫別號貞菴成化丙午舉人授蘄州吳縣訓
導遷太倉學正既又教授鎮江府學皆能正己立教
士習丕變陞四川渠縣令清慎剛果捍禦鄣寇民賴
以安渠人繪像祀之歸輯蘄州志卷目見明史今失
傳

陳大中字時甫高祖清以官籍隸蘄州爲人剛正廉介
孝於事親宏治乙卯舉人正德戊辰進士授南京戶
部主事始至掌銀庫出納及代積羨金千餘司徒胡

公曰此足以愧既往風將來矣辛未流賊劉六等往來江淮勢甚猖獗出師防捕大中督理軍餉冒險應變皆合機宜癸酉奉查蘓松等處糧儲執法剗弊人不敢干以私尋出知慶遠府所屬南丹那地等三州土官舊各以金銀器物爲贄可千金悉拒之有鄉曰述崑爲獐曾藍錢壓等所據商旅非聚眾持弩莫敢往來大中率民兵擒其渠魁戮黨與數百人事聞獎譽有加擢轉運使至閩未久致仕歸構鳳麓書院因號鳳麓居士子吉言另傳

詳通志

蘄州志

卷十二

仕蹟

六

易濂成化乙酉舉人授四川武隆縣知縣潔己愛民建學勸士公餘不徹琴書政蹟詳武隆志

張思齊字希賢宏治乙丑進士令四會水患洊臻民聚爲盜思齊設法築隄遂成膏壤民阜盜息遷知亳州白蓮賊趙景隆掠歸德思齊偕指揮石堅擊斬之賊平陞四州僉事疏治麻衣河民便之尋遷副使備兵建昌勦雅州徼苗爲亂者鎮守中貴人欲攘其功誣奏思齊混殺良民逮至京事白改霸州民有訴中官奪產思齊上其狀部使者不報遂投劾歸起復瓊州

兵備累官布政使

詳通志

劉樽字宗器勤苦嗜學無間寒暑年四十六始中鄉舉五十登進士授海豐令民俗多詐樽將以道變之適罹外艱去服闋改令遂寧有能聲擢南京太僕寺丞馬政修舉陞知鶴慶軍民府取道還省墓以疾卒

馮翺字時舉別號雷厓幼穎敏強記年十四補弟子員後以太學生就選授山東兗州府推官治獄寬恕多所平反民有父病死而誣爲怨家所殺者獄久不決翺廉得其狀召論之曰汝父實病死不速殯顧欲緣

蘄州志

卷十二

仕蹟

七

是以陷人於罪耶卽獄成亦必啟函驗視殘傷遺殖汝忍之乎兄弟相向號泣叩首伏罪一郡皆稱其明時郡之佐承委督所屬逋賦故有賂遺或以例告翺驚曰此何例也名賂者亟還之踰年致仕歸先是爲諸生時旁舍火起勢且及翺自外馳歸負其母及先世誥命以出餘無所問宗族故舊婚喪之不能舉者賴其周卹晚建多景樓日與賓客觴詠其中或閉戶焚香燕坐怡如也卒年七十有七後贈吏部右侍郎

詳通志

甘棠字茂夫爲諸生刻厲專靜不以貧乏廢學嘗讀書城南石鼓寺鄉人從之游者取脯甃自給正德八年癸酉領鄉薦授雲南師宗州稱能吏於羈縻之中不失控制之法低昂伸縮悉合機宜遷河南嵩府長史卒

高鵬字汝南正德丁丑進士授涪安縣令冢宰喬宇薦其才當道忌之左遷亳州判官移知南充訊獄果斷不畏強禦士民仰其德歷重慶知府蜀藩長史著有四體發蒙秉忠定論風木雙思省心全要等書

新州志

卷十二

仕蹟

八

梁珠字瑩卿號近樓嘉靖戊子副車浙江涪安縣主簿多善政有旨旌獎民爲立去思碑

甘澧字鍾衡嘉靖辛卯舉人令旌德時條編未行澧裁省廚傳寬里甲諸費有中貴過縣索供億橫甚澧但致常餼而已中貴度無所得乘傳去

周禧字子吉號乾明嘉靖壬子舉人壬戌進士歷官南畿學校廣東監察御史生有異徵多夙慧性孝友初仕刑部主事旋入西臺風裁凜凜出按浙江權貴斂手大比典試屬董其事所拔皆名流築海塘嚴海禁

修備甚周島寇不能犯毀除淫祠妖僧消地方隱憂
浙至今猶傳誦不已視學江南首舉者惟正心術崇
禮義釐文體人文奮興卒以積勞致疾未究大業人
共惜之

吳鳳瑞字翼靈嘉靖乙卯舉人以理學爲鄉閭倡教諭
太和有師範督學檄主正學書院遷永豐令以遣戍
觸權貴竟莫能擠轉判開封有浚河功擢宛州同知
以直忤當道廉知其端方愈優禮之每書寄子必勉
以耕讀卒於任

蘄州志

卷十二

仕蹟

九

周祚號台峰嘉靖戊午舉人令海澄邑新造難治祚墾
荒招逋戶口以實覈賦清徭絕蠹食之弊慎舉鄉約
保甲民俗丕變後陟官郎中

福建
名宦

徐之徠字子迎號少華方七齡卽毅然有閉戶之志稍
長以五經食餼嘉靖戊午領鄉薦授四川梁山知縣
歲凶爲粥於路以待餓者蘇困減徭冰蘖自矢調常
州府武進縣不避權勢潔已奉公以恙乞歸每自語
曰以五彩囊盛栢葉露何可得乎遂務養生年九十
有二爲藩王行冠禮五飲於鄉爲正賓三末年杜門

著性命集至今傳焉

王之佐字以才號正齋嘉靖辛酉科鄉薦初任鳳陽府懷遠知縣舉卓異擢都察院都事改都察院經歷陞工部屯田司員外卽督理河東墻壘朝日壇落成補通惠河卽中轉雲南廣南府知府致仕歸築室閉戶不履公庭里族敬重焉

李盛春號夢池隆慶辛未進士選庶常時江陵當國盛春出其門下爲奪情事抗章入奏江陵避之莫不悚然於盛春之正氣而兼服江陵之雅量三年改吏垣

蘄州志

卷十二

仕蹟

十

時東宮未正位叩闈特疏詞甚激切旁觀者盡危之終不及於難旋出副閩臬王文衡所拔皆名雋以積望入陟清卿出撫保定時礦璫肆虐四方騷動盛春力請停役爲太監王虎所扼然在任數年核兵馬實數綜錢糧整飭戎備厲行伍修廢舉墜卓有成績亡何黨議紛起盛春方晉南少司馬堅意乞歸與昆季子姪深篤倫誼尋卒特賜謚恭質諭祭葬陰其子柳爲廣西太平府知府祀鄉賢

易鴻磐嘉靖丙午舉人陝西韓城知縣政簡刑清百廢

具舉有古循吏風尤喜誘進士類以詩文相質者皆指授不倦旋致仕歸卒贈中順大夫

易龍見嘉靖己酉舉人雲南路南州知州路南多冤獄甫下車皆雪辨之號爲神君卒贈奉政大夫

李建中字龍源時珍長子性至孝十歲能文十二爲諸生有巡按御史舟阻風駐驛諸生八謁指柱構橐孔曰楓木年深生孔子建中應聲曰菊花秋老見黃香御史大奇之曰子才位當亦黃公一流嘉靖甲子舉於鄉六上禮官不第署光山教諭爲諸生授經束修

蘄州志

卷十二

仕蹟

七

轉給寒士陞四川蓬溪知縣梓潼地饒俗靡建中以廉率下時布衣角巾往來赤城青石風門明月之間著有蜀遊草明月山詩數卷潼川早建中草履行禱卽日境內大澍呼爲李公雨後攝安岳新令至安岳人稱但願如攝令者其攝遂寧亦然封文林郎擢永昌同知因親老不赴三上牘乞休歸無長物惟桃竹蔗霜以餉媼知父母年七十不異孺慕居喪水漿數日不入口年六十三卒於家門徒多貴千里奔喪數十人以子樹初貴贈中憲大夫祀鄉賢

顧景星撰

馮汝承號繼山大司寇天馭子廕貴州思州知府思州地連谿箐獞苗雜處汝承才性通敏設條令勸農興學風化大行

易可訓嘉靖甲子舉人授四川眉州知州調北直昌平興利除弊所至有政聲

李孟春號愛池隆慶丁卯舉人初任河南西平縣官箴清肅值歲旱鬻產佐賑踰年復有蝗雹災孟春禱息之不忍開徵者數年考成無具爲撫按所劾民泣控願完積年逋欠當事疑之隨查覈果全完嘆曰有牧

蘄州志

卷十二

仕蹟

三

民若此者乎悔其疏已發亟爲雪之得陞順慶同知去任日勒石建祠任蜀有奢酋之亂屬主儲備之計上下倚賴尋轉江南刑部主事語人曰吾弟舉進士行將出而仕矣事親之任非我而誰世傳孝友皆奉其遺訓云祀鄉賢

李際春字和元孟春季弟也萬歷丁丑成進士宰歸安時詔量郡邑田豪右隱占獨累窮民際春按籍履畝未嘗少徇移戶曹遷涼州叅議尋督廣西學政歸以薦擢四川叅議陞汝南副使平礦盜沒心秤之亂歲

饑拮据荒政全活甚多以勞瘁卒於官際春天性孝友嘗訓其子曰吾居鄉居官惟以鬼神二字時時在念汝輩宜知之子挺孫本晟另傳

李載陽號旭峯萬歷丁丑進士令洛陽才長識裕敷政明敏丈地清徭百姓稱便後以南御史出守漳州加意學校歲饑多方賑恤客役夜譁廉其魁寘之法衆皆讐服累陟太僕卿

秦河南福建名宦

袁世振字抑之號滄孺萬歷戊戌進士授江西臨川縣知縣請水次建倉臨川始無漕免候守之苦善論文

蘄州志

卷十二

仕蹟

三

知艾南英於童子升金華府同知戶部山東司郎中鹽法壞商鈔不行諸大煮鹽哭於部堂世振爲十議上之羣議多撓阻上覽奏嘉其能特拜兩淮疏理鹽法按察副使賜璽書疏理之官自此始世振立十綱法政令甫立羣商歡赴期年法大行舊額外溢七十萬上降敕嘉獎加一級留任凡疏理四年助邊餉入太倉四百萬有奇會嫉者謀去世振用其黨世振聞頗不平力乞去其後朝廷思其功崇禎五年起爲揚州海防副使兼理鹽法未到任卒著有鹽法綱冊十

六卷子素亮歲貢生少負才名耽詩酒早卒士林惜之節錄白茅堂集傳

張星字聚薇六歲失怙能讀大父方伯公書萬歷壬午舉人事孀母至孝候寢問安三十年如一日上公車數不第或勸之仕星曰母在此身何敢許人終喪授如臯知縣時中官騷擾爲害星正色不避闔邑晏如邑有鹽塲十座每一撤丈費商人數千金星單騎自膳不費一錢焚香頂禮者三十餘里又沙田水漲壓沒民苦無收官苦徵糧爲害最鉅星捐俸從海灣濬

蘄州志

卷十二

仕蹟

古

河道水入海民遂有秋通州有鉅蠹通家八府官民皆畏力請撫按鋤治之兩邑尸祝不衰遷歸德府同知致仕歸里外事不預聞六登鄉賓享年七十有七祀鄉賢

夏忠號孺和萬歷辛卯舉人筮仕桃源海濱苦盜忠修葺城堡申嚴保甲萑苻無警陞任宛鄧陋羨甚重忠痛革不取鄧有大辟繫獄者百餘人忠惻然心隱出脫九十二人梓有鳴冤錄陞思明府同知致仕家居築清白堂先墓側著有文禁十卷蘄州志書八卷未

刻祀鄉賢

汪宗文字綱先號泗溟家世積德昆季列膠庠皆擅名
譽以孝友聞中萬歷丁酉鄉試令江西上高民瘠而
玩惟務惠緩不專倚法民以感動逋賦應期告竣績
聞於朝擢戶部主事管河西務鈔關通商裕國自奉
淡如復差淮安板閘不易初心轉南康守多善政晉
雲南副使巡撫都御史薦進右參政以老乞歸上聞
宗文賢特進階右布政以寵之歸築室鳳凰山卒年
八十有三著有元滙集易解不昧堂兵火失孫蘅另

蘄州志

卷十二

仕蹟

五

傳節自茅堂集傳

蕭震字上嗣號倦山少負文名萬歷己未成進士初授
中書舍人天啟乙丑遷工部營繕司主事典試直隸
鄉試得名下士爲多轉刑部郎出知浙江紹興府以
廉能稱兼攝浙江副使直言極諫與一時朝貴多齟
齬因移疾歸里講學家塾其族多能文者著有遂初
賦稿一卷詩文百餘卷燬於火節江麓堂集傳
晏攄忠字元灝由含山遷蘄家世積德父及時博學多
聞教攄忠中萬歷庚子科舉人授廣州海防丞歲有

軍餉四十八萬屬丞支放不隱纖毫撰有粵政條議
瓊州生黎與熟黎構禍當事者勒兵深入後援逗畱
前軍盡衄摠忠監紀其地策情形急白大府止固藩
籬行其議寢兵遂無黎患在廣州八年陞韶州知府
禁採爐千石釐遇仙橋稅固江岸嚴游徼茂績大著
擢臬副分守粵西右江以疾辭歸後贈中憲從祀鄉
賢

王臣紀字爾瞻萬歷丙午舉人初令江山有巨猾柴某
武斷鄉曲已復聚謀不軌臣紀立除之陞泗州牧時

蘄州志

卷十二

仕蹟

六

魏黨脇附數乞歸不予告尋丁外艱服闋遂不仕弟
臣縉另傳

李猶龍字又明崇禎間由貢士任石屏州牧值普名聲
叛攻圍臨安州有土人倡亂立斃之境內肅然率民
固守賊不敢犯州賴以安

雲南臨安名宦

李雲慶字紀卿時珍曾孫崇禎丁卯舉人初任福建將
樂縣知縣潔清自矢勸農桑興學校調泰寧昭雪疑
獄乞歸日行李一肩送者爲之流涕

福建名宦

梁佳宇士奇號月崖明廩生援例授四川璧山縣縣佐

以終養歸建烟光樓築險禦寇於州事多所裨益祀鄉賢
邵思學字麟山明嘉靖辛卯舉人南京宿遷縣知縣祀鄉賢

國朝

張效葵字叔向號誠菴邦翼次子天啓甲子鄉舉授嘉
魚縣教諭造士有法與黃仲霖有落星亭唱和諸集
遷四川鹽亭縣令縣多蕪田葵履詔清丈民賦始均
又牛斗亮等以傷人抵命案既成葵訊知其寃皆平
反活之尋擢陝西延安府同知政聲益著年七十卒
李本晟字暘若號嵩岑際春之孫挺之子初度時大父

蘄州志

卷十二

仕蹟

七

夢有人冕紱輿從止於庭自言唐西平王因名焉幼
穎異有蚤譽順治戊子舉於鄉己丑成進士授工部
屯田主事辛卯分試直隸所得皆名雋出理徐淮河
中清稅釐弊商民頌之陞廣西僉事分巡蒼梧時西
粵用兵督餉飛輓毫無匱乏常率輕騎撫徭獯定陸
川博白山寇遷雲南按察副使值運道阻滯升米百
錢來降者不得芻食皆應丸策給之建義倉招流散
出俸勸義緝贖俘戶男女滇民帖如陞雲南右布政
後奉裁歸里值吳逆變以晟久轄滇南遣謀客投偽

劄至蘄晟縛以

聞起太常寺卿轉大理寺正卿巡撫浙江晟天資厚重
與物無忤歷敷中外三十餘年官箴清肅調劑兵民
獨得大體撫浙時不矜不伐有古大臣風以勞瘁邁
疾卒於官遺表上

賜祭半壇浙人祠祀之著有三楚文獻錄知天閣諸書

行世

詳通志

高培字茂先號尙孚由恩貢官衡州府同知改調南昌
府尋陞臨江知府康熙元年丁內艱服闋起補台州

蘄州志

卷十二

仕蹟

六

知府時八閩不靖浙東諸羗靡不被兵自永嘉丹崖
失守章安遂爲危疆培調輯軍營訓練鄉勇請蠲賑
均徭役人心以固章安扼要遂爲東浙藩籬督撫上
其事陞分巡溫處道在任十年致仕

顧咸泰字斌素號思菴順治辛卯經魁任大名縣知縣
禦水患廣積貯除妖尼輯軍弭盜咸有能聲予告歸
縣人勒石立祠以祀詳大名縣志著有石倉詩補行
世

李本衍字介繁櫛次子順治戊子貢授河南睢城縣令

下車後除積弊懲猾蠹修學宮建書院賜貧賑乏不遺餘力朞城舊多盜官不能制本衍相地要害築望樓伏丁壯設法誘擒之大盜屏息歲大旱祈禱無驗衍晝暴於日夜宿於露三日大雨常發沙西賑後粟竭盡鬻家產充公民始得蘇去任之日遠近送者遮道左

張承瑞字帝先號問蕉由歲貢授福建寧德縣令下車首清社夫里役築砲臺禦倭寇修趙公橋以便行人時防帥恣軍剽掠大爲民患瑞單騎諭止之及歸寧

蘄州志

卷十二

仕蹟

九

人勒石紀績後補山東滋陽縣稱幹員屢奉憲檄駁審疑獄昭雪者二十餘人著有好生錄以

覃恩勅封文林郎孫彥舉人另傳

張承位字生共號繩菴順治丁酉舉人揀浙江桐鄉縣令興賢愛民務行其志部有猾吏位欲寘之法吏倚勢家翫法曲縱遂移疾歸里寄情詩酒不與戶外事性好獎進後學然不輕許可被其容接者多知名當

世云

陳言先字以詞歲貢廷試上卷授九溪衛教授其地獠

苗雜處人不知學言先多方造就庠內外皆彬彬爾雅舊衛屯諸生貧者多典出造運罔措每爲之持籌言於衛守勸諭典者得半價以贖無力者輒爲捐助涓賴以濟予告歸感者咸立石以紀德幼失恃事父至孝每冬夜父不寢必先溫其被父髦齒脫食輒唾言先以孟盛自調食年九十三卒於家

孫天衢字幼岐歲貢生任隨州訓導尋陞武陵縣教諭訓迪有方一時諸生多所造就

李垣字公濟號我平增廣生援例授亳州同知稱幹員

蘄州志

卷十二

仕蹟

三

經理江南八旗糧餉歲省帑金數萬陞直隸趙州牧甫渡河遇饑民挈孥南竄垣給資令歸鄉土隨行者以千計下車逢奇旱禱之立應發倉貸民穀種歲乃有秋尋遭蝗害飢民載道垣設厰爲糜捐置寒衣千餘領以衣窮民境內德之以疾卒於官州人祀名宦祠著有增刪卜易行世子永昇舉人另傳

張啓翼字仕翰歲貢任應城訓導教士以敦本爲先邑向無衙署翼捐資建造乞歸後值歲荒收卹族鄰輿論推之

王永圻字公錫號申菴博學旁通諸書八歲時避獻逆
亂與父母相失落水漂泊百里外能知其父母所在
人咸異之康熙丙寅以歲薦授衡州府嘉禾縣訓導
修文廟課士詳嘉禾志先是爲諸生時于清端公在
江南聞其賢聘教其子蘇松撫軍于公準其生徒也
熊心璋字公朗號特菴康熙戊午舉人狀貌魁梧夙負
經濟授彞陵學正一以端士習興文教爲已任時學
宮以捐俸改修釐祀事定課程與人語必勉以道誼
諸生質辨經疏皆厭所請而去州科名由是益盛繼

蘄州志

卷十二

仕蹟

三

補廣濟教諭一如彞陵著有芝麓山房集

張仕渾字近愚號鹿樵康熙甲子舉人丁丑進士初授
保定縣知縣後任清水五充同考官所得多知名士
壬辰夏邊陲告警軍興旁午仕渾篆佩八邑屢著勲
勞其文縣近地熟苗勾引外苗搶劫仕渾單騎入其
寨諭以忠義衆苗羅拜散去伏恙夏久旱禱之輒應
泰安連邑染疫癘入人室有聲仕渾聞其事齊戒牒
城隍疫遂寔凡所至皆潔已愛民卒於蘭州

張仕學字琳山康熙己卯舉人任沅陵縣教諭興學造

士無忝厥職尋署辰州府教授會永順司苗民猖獗
督撫委諭悉歸順加軍功一級又委修辰河路工完
固民咸德之卒於官

陳常字藝極號靜齋貌魁梧性剛正族里咸推重之由
廩貢授邵陽學博勤校課一時甄拔多名士以母老
乞歸後補漢川不就在官置學田居家修學宮以及
宗祠族譜橋路義塚諸善舉皆勇爲之費累千金壽
七十卒子欲珍另傳

王夢弼字兆良號雁巖事繼母以孝聞中康熙己卯舉

蘄州志

卷十二

仕蹟

三

人授祁陽教諭稱貸紓諸生急繼補新化近苗疆習
俗頗悍弼漸摩之文風丕變尋陞宜昌教授時宜郡
初建學修署身董其事校課扁門分以苜蓿諸生皆
欣欣就正焉乾隆八年謁選歸以疾卒

張之梁字劍川仕學弟康熙戊子副榜任崇陽縣教諭
造士有方悉清被侵學田作貧士膏火又石城古堰
注田三萬餘畝學田居其中梁欲爲士民計久遠派
工修築早無竭澤堰戶立碑頌之

陳欲珍字席聘訓導常之長子由廩貢授恩施訓導築

館舍贖學田定課程邑人爲立碑紀其事丁父艱歸
盡舉父所捐修者補葺之或又加廣今合濟繼志等
橋是也後補安陸以母老辭

陳文藻字華章號蘭亭襁褓失怙事母以孝聞雍正間
援例以州同効力河工署中牟縣佐督率楊橋小潭
溪十里店毛家庄等汛總河朱公嘉其能復以鄭州
陽武滎澤曹縣各汛委代之咸有成績需次光祿寺
署正乞養歸時州牧開濬隍池屬藻董其事區畫皆
善

蘄州志

卷十二

仕蹟

三

熊淇字衛瞻號竹園蘄州人湖口籍成癸丑進士授博
興令甫蒞任卽奉檄浚河築長堤百餘里工竣大吏
咸以爲能弭盜有法逮訊必反覆諭以至情多原釋
之賊諒其誠相戒不入境卒於官著有竹園待正稿
陳履中字遠登號岸如別號菖湖乾隆乙丑進士筮仕
貴池未半年解任池民攀轅不忍舍脫鞋一雙供奉
城隍廟中每城隍誕辰同前循吏某蟒袍捧獻並崇
祀名宦祠方未赴選時歲壬申有逆賊馬朝柱假邪
術煽惑愚民以天堂寨爲巢穴會飲立誓黨羽日衆

蔓延英霍靳羅及崇居楊河等處中乃密約大同司
吳星夜赴州聲明州牧李卽飛稟上憲親督營兵駐
樂如菴中捐備糧草招集佃戶全弟軼前隨官逐處
督拿旣又迎提憲哈到家供應事平李公陞本府知
府以爲國宣勞額贈之

劉萬宜號襄堂弱冠補諸生爲文多神悟其家藏書頗
富父嶠爲其昆季析箸獨以書俾宜宜益自奮勵領
乾隆丁卯鄉薦授石首教諭甫抵任以形家言增修
學宮鬻牆三尺許以培地脉石邑自後科第相望又

蘄州志

卷十二

仕蹟

三

與縣令黃謀建石壇書院於學宮前縣令強宜授生
徒一時從遊者皆奇傑士縣有疑獄陳氏子幾以無
辜抵罪公力白其冤得脫州孝廉呂鳳岑卒於都宜
爲之治喪具歸旅櫬後以秩滿保題赴都未果卒於
家有蓼裏堂文稿待梓子之棠進士另傳

詳通志

陳良翼字孔十號卦峯乾隆癸未進士除福安知縣調
繁福清督撫以卓異薦會諸羅彰泉人械鬪大吏稔
良翼才且以爲能靖民也更調諸羅又二年推陞嵩
明州知州以母老告養旣得請矣會有疾未及歸踰

年而林爽文作亂破彰化陷諸羅殺文武官吏良翼亦就縛縣民奔救之曰奈何殺我好官得不死當是時爽文犯臺灣不克遯歸大里杙留戍諸羅賊無幾而鄉民起義者日益多良翼遣人間道言於府越明年正月良翼率義民會總兵柴大紀復諸羅遂奉檄復知縣事諸羅居臺灣南北之中於時彰化風山相繼陷府城實藉之爲藩蔽故爽文圍益急而良翼之守益堅嘗兩獻策於大帥請乘虛搗大里杙賊巢而分撥一軍夾擊之又請分軍一出斗六門一趨他里

蘄州志

卷十二

仕蹟

五

霧遏其後而諸羅之兵過牛稠溪攻其前皆不省而援師遷延至刺臂血爲書亦不應乃深溝高壘日激厲民兵堵禦無虛日自六月被圍迄於十月火藥竭兵民食且盡乃禱於神以油粃爲糧士民皆忍飢荷戈以俟 大兵之至而府城得恃以無患良翼力也 事既平追論餽道府節禮草職又在圍城審錄俘獲具得疲廕老弱有保証者數十人力爭於軍門釋不殺而勉從大紀原奏以已戮報迹涉扶同擬斬監候讞之日士民皆翕然同聲猶謂良翼保全無辜泣數

行下也

皇上察其情釋令回籍越一年入都祝

萬壽恩給知州原銜未幾歸丁母憂遂有疾竟卒葬崇居卓
馬山麓著有三生瑣談書二卷諸羅守城日記一卷

通志

陳受琦字越羣乾隆丁酉拔貢生選竹山教諭推陞湖
南衡州府教授時猺匪爲逆闔城官弁出勦禦琦留
守城城中火起琦身先救護上憲記功註冊年七十
七卒於官子炳堃諸生

蘄州志

卷之十二

仕蹟

二六

陳丹墀號月圃嘉慶壬戌歲貢生選授隨州訓導學宮
頽敗捐俸葺修士民以德星輝映匾額爲頌子邦憲
附貢表言庠生

田玉榜名書田號樹人嘉慶癸酉舉人授武昌教諭端
士習興文教學宮被水圯勸輸重修告竣邑人士頌
以模範可風匾額以上潘志

陳懋績號攸齋歲貢生授漢陽郡學訓導誘掖生徒束
修之資轉給爲膏火出門下者多知名士晚歲告歸
以正直率族人樹老成典型之望卒年八十有八著

有樂善堂文集

陳鑾號芝楣蘄州人出籍江夏嘉慶庚辰以一甲三名進士授職編修道光初元由江蘇知府歷官兩江總制鑾具經世才知無不爲初守松江釐海運章程漕艘無一滯者繼守江甯被水災民蔽江下捐廉悉活之其任上海道也濬吳淞口置救生船於黃浦江其爲江蘇藩司也築寶山華亭兩邑海塘計數千百丈開太倉州昭文縣河以興水利他如陳臬浙江修太湖隄岸開府江西又修沿江圯岸一如在江蘇時

蘄州志

卷之十二

仕蹟

二十七

鑾爲

成廟所倚任一歲數遷擢任兼圻益圖報稱前後在兩江時久設義倉以備荒政修書院以培文教善政尤多及署督篆奉

命閱三省營伍實力整頓以積勞成疾卒於官

上聞贈太子少保銜長子慶涵

恩賜舉人江南人士立像於滄浪亭春秋祀之並請入祀名宦祠鑾少年博學以至性結主知在翰林時嘗奉

旨書

昌陵神碑其後入

覲也蒙

詢所置贍族田

御書義莊二字以賜其

恩遇有如此著有畊心書屋詩文集並輯有先正格言十卷

三楚歷朝名賢墨蹟撫楚帖十卷

陳準原名錦階號笏生嘉慶癸酉舉人大挑二等選蒲圻訓導旋丁內艱起復改公安教諭俸滿保薦知縣分發山西歷署八州縣事所至均有循聲初蒞應州

斬州志

卷之三

仕蹟

二十八

前官沒於任虧項二千金有奇慨然承之缺遂負重累權和順月餘清理積案數百件除廐馬芻秣稅民感激額頌去之日攀轅餞送者盈於路在長子時草社長訛索患盜風竟息最後權平魯勸民買牛力穡屠牛者斂迹楚黃人流竄平魯者適遇

恩赦悉給厚貲遣之其他惠政多類此咸豐丙辰卒於官所著有剖瓠集詩文雜作待梓子紹棻太學生際雲待銓少尹紹榘太學生懋元歲貢生孫璫諸生麟廩

生

陳懋烈號灼亭道光甲午舉人大挑知縣歷任福建將樂福鼎漳平縣事所至多惠政兩充鄉試同考官拔錄皆知名士在漳平任內升授澎湖通判民間令當去叩大吏乞留格於例焚香泣送繼屬不絕旋升知府引

見仰承

天語垂詢閩中吏治奏對稱

旨加道銜授臺灣知府會戴逆作亂勢甚猖獗烈不動聲色剿撫兼施未數月獲其魁置之法餘無所問事

蘄州志

卷之三

仕蹟

二十九

聞奉

旨以道員留閩補用並

賞戴花翎署臺澎兵備道兼提督學政練兵籌餉校士衡文悉臻妥善歷署泉州邵武興化府知府人相戒曰此通省稱廉能者不可犯也其見信於民如此光緒己卯因病乞休箋再三上大憲慰留七月卒於官年六十有七子德衡分部員外郎德新福建候補同知德

輝候選主事

陳筠號篁生道光壬午副貢署安陸府教授實授長陽

縣教諭修葺學宮日集諸生講誦不輟丙午卒於官
旅匱還斬門下士卹奠於道有泣下者

陳三辰號耀楣拔貢生授河南唐縣令嘗出清俸捐興
賢奮衛諸莊及武廟廊廡書院膏火課士公堂飲食
教誨五年中政平訟理桐柏亦以鄰封父母爲頌先
是桐柏頑民蠢動戕邑令中丞進剿駐唐邑始命南
陽守顧某前驅顧畏縮轉薦三辰爰募勇助剿賊潰
散是役也招募及供應犒賞費金八千有奇顧悉之
誡其通報不實撤任因恚恨以終子粹乾監生占納

蘄州志

卷之三

仕蹟

三十

陝西縣丞

楊崇興號峻峯幼穎悟與兄培興弟衢興同受知於賀
蔗農學使就職廣文厯署荊州雲夢訓導在荆南汰
拔萃科呈送及考試詩古册費一時稱頌明太守韞
田聘主宜都清江書院講席劉明府槃令嘉魚聘往
襄校均號得人會補荆門州學之檄至而興前數日
以疾卒於家

汪陶號小臯道光丙午舉人大挑二等厯署荊州府教
授枝江縣教諭補宜都縣訓導主講清江書院問字

者常數百人士風爲之一變丙子丁內艱服闋尋卒
著有挹秀山房集待梓

張其達字載敏雍正壬子貢生授鍾祥縣教諭操履端
潔訓迪不倦乾隆朝子源洙復以歲貢官其地

江筆華號穎卿廩貢生前署興國州訓導陞任德安府
教授一時俊彥多經陶鑄咸豐初髮逆告警郡守阮
委華督隨州團練未幾賊踞郡城華隨金觀察國琛
參謀戎幄請以桶盛沙壅城北河下流水灌北門賊
當自退金行其策賊果遁郡城收復時孔廟及試院

蕪州志

卷之十二

仕蹟

三十一

學署俱燬於賊新任太守王委華修治華遂勸捐鳩
工工竣以餘貲補葺城垣太守因華屢著勞績保舉
留任力辭還里唐方伯時駐營蕪州大同鄉諭辦軍
務以功議叙鹽課大使加知州銜子樹榮庠生樹芳
縣丞樹棻庠生孫廷燮庠生

朱燮元號理臣咸豐戊午舉人以大挑一等籤掣山東
援例告近迎養改掣四川署理鄰水縣事縣中民教
雜處俗強悍好鬪元蒞任甫一載寬嚴有法民俗頓
馴乞終養諸土司及紳耆焚香泣送具萬民帳者盈

道左歸里後尋卒年四十七

張汝璽字幹臣郡廩生佐多將軍幕保訓導署襄陽郡校旋調蒲圻將至圻令刑諸生於學諸生台控上游幾與大獄璽持以正事得寢尤廉潔自矢去之日祖餞盈衢有詩云鶴儉漫嫌官俸少魚懸終却贖儀多紀實也子必受諸生

楊世璐號昆山少隨長兄勉齋從師家塾先後食餼遊庠壯貢成均歷署武昌蒲圻通山宜都訓導所至以鑑別士類陶鎔人才爲先凡事關倫紀風化毅然身

蕪州志

卷之十一

仕蹟

三十二

任其成

以上新增

陳廷揚號小坡領道光壬午鄉薦乙未成進士權四川新甯青神樂至諸縣終鹽源令所至勸農課士詰奸捕盜政績歷著致仕歸里居授徒不履城市晚年主講麟山書院光緒壬午重宴鹿鳴年九十七卒所著書目詳藝文墓誌 十年重校新增

范步蟾號月珊增生髮逆亂蟾奉府憲許檄委辦團練旋以勞績保舉訓導署黃陂縣教諭解組歸值州人請廣學額蟾亦與有力焉子詒孫同知銜

武勲

志政蹟復志武勲者何康蘄國之渡江柳吉安之勇
往削平寇難境內晏如視夫從容民社而宦業成者
抑又難焉故別爲一目使觀者以類求云志武勲

明

康茂才字壽卿州人元末進士寇陷蘄州茂才結義旅
捍禦有茫茫江許皆魚鱉何處堪容魯仲連之語尋
從明太祖渡江太祖欲速陳友諒來寇以分其力密
諭茂才誘致之友諒敗走嗣後破蘄黃戰鄱陽湖圍

蘄州志

卷之十一

武勲

三三

武昌收湖南伐吳逼蘇州從征齊魯關隴節制太原
再征漢中所在有功軍中疾卒贈蘄國公諡武義

詳明

史本傳

康鐸字伯聲茂才長子襲封蘄春侯少有父風年十歲
侍太子讀書大本堂太祖灑宸翰賜之曰謹承祖業
爰爾勤功詔往墾鳳陽荒田年十八統兵征辰州峒
獠遂平松壘諸州後從征南將軍傅友德征雲南克
普定破華楚山諸砦明年卒年二十三贈宣力武臣
蘄國公諡忠愍子淵授祿未襲封

柳良正州崇居鄉人洪武初以武功封吉安侯嘗於打鼓臺墩集蘄州三戶軍戶其墓尙存

陳福清從高帝征偽漢陳友諒戰於鄱陽湖矢及御舟福清倉卒負帝過舟帝取一珠耳璫賜之福清以箭貫左耳懸璫帝曰真壯士也封千戶後叙功臣福清不與焉

李楷字端甫同春之子貌如冠玉風流英武萬厯間襲千戶職授靖州守備隨大將軍劉挺征苗播攀藤越樓關天塹建立奇功加世襲指揮陞福建叅將會海

蘄州志

卷之十二

武勳

三四

賊入犯設奇大破之擢吳淞副總官至貴州總兵歸里居喪廬墓孝友同居人皆賢之祀鄉賢

李棟字郅隆同春次子少爲郡名諸生負雋才兄楷無嗣承兄蔭陞武岡州守備廣西永甯州遊擊再陞四川松藩叅將盡瘁王事卒於官生五子皆庠生癸未城陷相率死難惟四子本綿存尋卒

王啟指揮使勝之子勝亡於陣啟年十五襲父職調充先鋒官從征雲南苗通道造橋應接大軍擒其渠魁又生擒七十餘酋斬獲四十一級拔城寨七十二晉

封明威將軍以壽終葬雨湖

陳圖功字朋燕中萬厯乙卯武舉後流賊猖獗圖功獻策軍門復請歸立羊角砦以衛鄉里兵憲范爲請職遊擊所在有功著有行路難柳絮吟等篇

以上錢志

李光禋字友夏有勇力善騎射崇正甲戌河南賊入蘄黃禋逃在外僅十二歲丁丑春江北賊竄入大山中左師入山搜捕徑投營中深見推許以將士從征視賊所向隨方勦撫已而至成都雜還於孔昌王部曲中王視師下玉營爲盧將軍所猜阻旋以射蠟三枝

蘄州志

卷之十二

武勳

三五

膺首選掛官軍前鋒印後累以功遷總兵官鎮銅廠三年予告回籍時同邑雲南布政李暘若雅相契重遂留任二年及歸絕意進取詩酒怡情督課諸子年九十三終

李氏新稿

國朝

李世忠字厚菴有膂力諳方畧康熙十八年吳逆亂世忠自備鞍馬從黃州王協鎮出征有功授千總復從征紅苗殺賊於六箐口殲滅幾盡生擒十餘人疏請授都司僉書管江西南昌銅鼓營守備事封武宣將

軍

楊天貞字自強崇正丙子武舉順治甲午副舉少讀書
通孫吳韜畧對策皆能指陳有膂力技藝絕等倫康
熙初搜求材勇貞上書台司請纓自効以功授守備
葉植字容伯號天培順治戊子武舉初授燕山右衛千
總以征西山有功陞山東靖海衛守備前官張某以
丁糧挂誤追賠力不能償植代賠數百金張得還鄉
陞臨清都司尋卒 以上錢志

陳臨號莊齋由蘄州營行伍從征金川屢戰有功擢蒲

蘄州志

卷之十二

武勳

三六

圻千總嘉慶戊午教匪餘黨擾崇蒲二邑臨隨營悉
殲之陞守備

吳大章千總嘉慶初值陝西白蓮教起應有司募糾鄉
勇保護一方守城有功授外委後奮力前驅諸督憲
賚摺

上聞凱旋授延安府營守府兼護本營叅將事年七十五
卒於官

易光殿由武庠生入蘄州營行伍擢黃州協城守乾隆
乙卯從征湖廣川陝等處屢立戰功擢四川大壩營

都司陞我邊營遊擊年七十致仕以上潘志

新州志

卷之十二

武勳

二十七